

中國方志叢書·華中地方·第六〇三號


據

明·萬·廷·謙·等·纂·修
明萬曆四十年原修，民國十二年重刊排印本

影印

浙江省

龍游縣志



成文出版社有限公司印行



10098337

中華民國七十二年三月臺一版

龍游縣志

全一册

發行人：黃 成 助

台北郵政信箱二二六〇五號

出版者：成文出版社有限公司

台北郵政信箱二二六〇五號

台北市杭州南路一段6巷9號3F

電話：三九一六四一六（五線）

印刷者：上林彩色印刷有限公司

台北市大理街145號

新聞局出版登記證：局版台業字第二四三號

重刊萬曆壬子龍游縣志序

咸豐季年龍游罹兵燹至劇閭里爲墟故家所藏書籍焚失殆盡亂既定求一縣志不可得幸其時先曾大父游宦廣東篋中尙存康熙舊志一帙遂成孤本歸田後慨然有修志之願顧一時未易集事慮孤本一失後益無徵爰有重刊之舉卽今通行本是也紹宋無似去歲還鄉辱父老以修志事相屬貿然自承冀完先志受事以來頗病康熙志之簡略苦不得明代舊志讀之僅檢浙江通志所引諸條以爲參證別成萬曆舊縣志輯佚一篇並爲之序以謂通志所引卽此壬子志益憾其不可得見也今歲二月朔偶訪葉君左文渭清於京師圖書館始知館中藏有此志大喜丐葉君代付鈔胥錄之越十八日而祝劼庵先生康祺書至謂於桐谿陳氏搜得此志一册於傅氏得三册合成完書爲之狂喜不寐蓋圖書館本多缺葉且印甚後有泐漶至不可讀者正苦無別本

校勘也互校既畢以校輯佚各條知通志所引殆多本於萬歷丙子本非盡出此志也則深悔嚮者之序爲失言吾宗岫雲諭德序康熙志譏此志不無舛漏頗中其失顧以兩志合校覺康熙志刪所不當刪者頗多而增補甚鮮於其舛漏之失未嘗有所糾正也而翻覺此志爲良略舉數端以張吾說宏治戊午萬歷丙子兩志舊序此志載之康熙志削之今兩志久亡藉此得窺其大略一也徐可求序自署邑人文中且云家世於龍是明明龍游人也康熙志削此序選舉志於徐任道注明澱水鄉人可求其昆季也康熙志削此註不有茲編何由佐證二也此志以山川屬輿地是也康熙志必析之而別立一目且不次於輿地焉以水利屬輿地亦可也康熙志必欲析之則宜入建置而別立一目果何爲耶自體例言此志亦勝三也詩文之屬附注山川建置祠祀諸志之中最爲方志陋習此志獨不然四也王街狐墓石鼓等古蹟康熙志悉不

錄按察司龍游驛之沿革亦然風俗物產祠祀中亦有爲其刪削者得此志始知之五也官師不似康熙志以後世官名施於前代甚符名從主人之例元代防守武職五人康熙志悉削之非也六也選舉志於諸人仕歷記載頗詳其行事有可嘉者並爲附注康熙志刪削甚多又元豐元年黃裳榜下注云失名所以待考甚衷闕疑之義康熙志逕刪之亦非也七也康熙志於人物補樓惠明考南齊書惠明附徐伯珍傳稱同郡樓惠明惠明果爲龍游人則奚不曰同縣而曰同郡言同郡則非龍游人可知此志不載是也康熙志又補鄭灼考陳書南史均曰東陽信安人其時新安久自太末析出而太末尙未省入信安不知何所見而補入也此志不載亦非漏略八也人物傳後附行略體例固非所宜然其略載徐泌徐庚虞彥夫余嶧王仲修徐有功徐講徐以昭方變錢康諸人之仕履與行事謂不欲盡沒其名行意頗矜慎康熙志乃悉刪之

不知諸人何辜乃遭擯棄九也宋史徐徽言傳稱徽言爲西安人通志府志亦然舊志載之以爲誤入矣今讀行略載徽言先世世系特詳且註明家縣之官塘稱官塘徐然後知載徐氏此族並非掠西安志之美康熙志旣載徽言則奚爲刪行略所述自失依據十也凡此均足補康熙志之闕失其人名地名之足以訂其刊誤者猶不尠焉嗟夫咸豐兵燹以還康熙志已成孤本今乃得此志且同時得兩本以互校之其有裨於今日之脩志者何如寧非冥冥中有相之者耶今者局事方始經用尙艱益以不才如紹宋者承其乏纂脩之業豈敢曰必竟其功而變亂相尋人事無常尤難豫度則收拾叢殘俾無遺佚固先務之急者矣因叙崖略刊而行之亦先世重刊康熙志之意也夫

民國十二年五月縣人余紹宋謹序

龍游縣誌序

夫邑之有誌如國之有史也疆域之沿革治理之興替師帥之臧否民生之榮悴人物之盛衰靡不悉而賅焉此賢知得師之地而愚不肖警心之林也故善治者無不於志修是亟矣蓋一興除亦一利病而此則百世賴之然自侈於富強之烈者或孫心於禮樂之君子此又何可易議耶吾龍舊有志因陋襲舛疑在不刊歲丁未而萬侯百谷來蒞政歲壬子而政成搜奸沃本樹鵠維風廢者舉矣缺者備矣疲者起矣媮者恬矣椎魯者彬彬矣微侯之才之德不辨是而侯尤有遠心也乃進博士鍾君邑望曹君挖揚舊志以比憲章將告成事而屬求不佞弁言於首求以是嘆侯之嘉惠吾龍未已也夫龍固巖邑而動稱狡悍此何可令隣國聞焉今所考往誌蒞事穆乎有身先之化而懿文濟以應上風猶綽有三代之遺意猶夫望邑矣教則不淑以尤其民民之不則其何憾焉侯固不易民而化也五載以治不必世百年而善以仁雖其緩急張弛應節之妙未易縷指而如所修飭整舉補偏揀敝之略與文潤邑之猷志具在也已章章乎垂簡册而昭來茲矣按今冬故事宜修觀典侯此行也挾所葺志以上應功令即不能盡

其緩急張弛應節之妙而其大者不已班班可攷鏡乎於是考功氏將舉茂異以相明
驚而侯且未必復來其或繼侯者志具在也墨可繩芳可襲絃可恢未備者可師以意
而湮沒者可循以求知政知德豈異人任而乃無紹述侯績者以永言侯思故夫侯之
嘉惠吾龍未已也求不敏無能史語以媚當事而家世於龍其所汪潤身被之即先氏
之遺跡藉不朽焉民之不能忘也康衢擊壤所自來也雖不敏亦宜從而後也
明萬歷壬子賜進士吏部文選清吏司郎中邑人徐可求謹

重修龍游縣志序

昔在周官外史掌四方之誌後世郡縣相沿勒為成書則固四方之舊也羅郊圻民社於指掌而鑿沿革經緯於善敗詔世傳遠於是乎在邑之有誌不猶國之有史哉高皇帝大一統分部而概志之區分臚列則有司為政迨今或志或否豈其分上殊耶大都令長輓邑猶蓬廬耳初入境謠俗風土未及辨興利除害未及知何暇網羅載筆久之政暇慨然衡鑑自任而綜變論世考覈為難病無徵矣閩史之言不越丘里章縫之見不出井蛙良非馬遷直非董狐而欲聲實中窾臧否惟一偏聽成淆其足信者幾何病不尊矣龍丘浙衢勝壤水陸輻輳往吾鄉光祿涂公筮仕茲土故有丙子志成於一二青衿之手繁蕪蕪世未經潤色觀者未終篇而掩卷與無志等爾余承乏邑事日競競理簿書祛宿蠹之不給如文事何既三年報政吏牘漸減迺以公餘蒐舊志與廣文錢塘鍾君相業邑人曹君聞禮商確而損益之志目凡十首分野而終以雜志余不任創也增補近事汰冗酌宜一切抑揚去取令自為政寧嚴無濫不開噉名舉訟之門以昭畫一余不任因也要以義同竊取而不患無徵按籍而稽得封字所繇範防貢賦所繇

盤縮戶口所繇登耗土宜所繇虛實人物所繇盛衰宦蹟所繇隆美教化所繇維持周
友咨諏不遺餘力夫豈敢師心獨任哉知我罪我不恤矣抑因是有感于龍丘之傲
也當成弘間休養生息民靜而安俗樸而儉閭閻不識胥史幾於標枝野鹿之風迄今
吏猾民玩囂而不可治望龍丘而至者往往以爲懼府不得展布其功能遂至數十
年無一完令厪聖天子難治之憂此其責屬之上耶屬之下耶傳曰一張一弛文武之
道又曰溫之涼之與時宜之則在司牧者矣則在司牧者矣後之睹是編者見禮而知
政於以預圖力挽潛消默奪風移俗易登之平康斯志尙亦有利賴哉

昔萬曆壬子孟冬望日文林郎龍游縣知縣事豫章萬廷謙撰

龍游縣誌目錄

卷一 輿地 舊志分野諸款二卷
分載今案為一卷

卷二 建置

卷三 祠祀 附古蹟

卷四 田賦 附物產

卷五 風俗

卷六 官師

卷七 選舉 附臨封諸條

卷八 人物

卷九 藝文 附著述

卷十 雜識 附莫祥

志凡十卷計刊板一百六
十二片在儒學尊經閣

龍游縣志

明知縣南昌萬廷謙纂修

訓導錢增鑑相業校

邑人訓導曹聞禮訂

縣志圖目 周禮土訓氏掌四方地圖凡陳地大要彼圖斯見故縣境以下諸圖並列之篇首云

縣境圖 縣城圖

縣治圖 學官圖

龍江八景圖 舊志有八景總圖條理未便今分繪之俾采勝者游目

舊志序附錄凡三篇

弘治戊午重修縣志序

都御史樊鑿撰

昔者聖人王天下因地以制貢觀民而設教辨五物九等以教樹藝故凡天下之形勢土俗必藉以記之若九丘禹貢職方之類是也三代而下治不師古雖歷有志文具而已唯我朝蹟先王之舊業者既命儒臣編輯國誌復詔郡縣纂修實錄將使吏於上者知土俗之勢酌教養之宜權寬猛之治焉爾龍游令六合袁君邦振有志經世以王道故樂承王者之德意念茲邑誌舊編簡繁倒置亂雜而無章乃於製錦之暇斟酌損益折衷至當之歸斷之在已既而託高王二氏編摩成秩就秋官吳公而正焉書

成請序於予予覽之再四了其顛末綱舉目張而書法不苟首縣境正疆域也次沿革次分野明建置
雖殊而星土不易於形勝風俗戶口賦稅出產農事以及學校人物關於治道者謹錄備載不遺纖悉
其辭實其事信詳略當義條理不紊傳曰其善志此之謂歟夫百里之內山川有夷險土田有上下俗
尚物產有彼此誌不備則知不預欲治而適其宜譬如中夜有求於幽室之中非燭何見此袁君雖欲
無事於此不可得已或曰君作令是邑政平賦均風移俗易六年於此矣教養之法創置之跡其見於
志者後先相望謂由志而後善其治非所聞也答曰君子不以其所能者病人是編所以預後來之鑒
使知土地之宜奢儉之異於以盡輔相之道示儉禮之規與凡農桑水利橋梁貢賦之屬所以惠下益
上者誠所盡力而澤及無窮焉噫此其爲君子之用心是爲序

萬曆丙子重修縣誌序

知府尹燾撰

周官外史掌四方之志凡侯國皆有史官掌記時事登藏王室以備鑒觀其道盛矣秦罷侯置郡縣則
縣令固故諸侯也畫壤分符以牧長一方以主其土地人民治教之事厥任惟重故邑之地利民情土
俗之宜禮刑兵賦教養之法必謹奉我憲以時省察而弛張之慮其佚也復彙次而書於冊以告夫新
令尹者志之所繇作也龍游自有縣以來代爲要區邑名互五更易明興海內爲一龍當衛鞅之交舟
車輻輳賦役錯出文書填委部使者往往留意焉舊志兵燹無存其修於前令袁君者又多簡陋弗稱

南昌涂君奉命來知縣事修政布令釐敝剔奸肅敏溫裕民用休洽政暇詢及邑志缺軼愴然有懷謂茲政典所係堂堂鉅邑不宜怠廢不講迺取弘治中舊本延邑人余子湘童子珮相與討論纂輯蒐採舊聞參以新得芟其繁蕪補其闕遺其有未盡之指每篇復爲論列以寓憂時救敝之意總爲一十卷爲目凡二十曰輿地圖曰分野曰疆域曰山川曰溝洫曰建置曰防禦曰祠祀曰古蹟曰田賦曰物產曰風俗曰災祥曰官師曰選舉曰名宦曰人物曰藝文曰雜記以明星紀以正封略以表形勝以興水利以重民力以戒不虞以崇祀典以闡靈秘以定經制以物土貢以防民慝以垂鑒戒以修職秩以揚俊又以昭翰墨以樹風聲以備諧語王道之大端備矣書成屬予序諸首予惟志史之遺也令邑之主也修志以盡職盡職以安民由近知遠而天下之治可幾矣故曰入其國其政可知也故觀疆域山川溝洫防禦而知疆理慎固之道焉觀建置祠祀田賦物產而知綜理愛養之宜焉觀風俗官師選舉藝文人物雜記而知表率振作會通之機焉雖然石關雕麟吐之意然後可以行周官之法度政固有本也觀是志者豈徒徼一時之得失哉涂君學優而才裕其爲政識其大者如興學校建義倉節浮費循良之績皆卓然可紀故能以其餘力而及於志之事其政業之圓偉詎可涯哉予不敏辱公授簡僭爲序其大略如此云

丙子重修縣志後序

參政陸瓚撰

常謂一家之生產種種色色家之父母必錄其數目登之記籍以遺子孫是記籍一家之所繫關焉而不敢勿又以必有是記籍以遺子孫而後爲父母之心始畢而無所歎一邑之志猶一家之籍也家之父母且顧恤其家思傳其子孫而爲之籍治邑者迺忽視一邑之志謂其無裨於政而忽之其殆無父母斯民之心歟邑舊有志漫漶已久余東塗侯來令吾邑即謀及於此底今而始獲成侯廉明慈愛天植其衷兼以歷年之久凡巨而國家之征輸細而米鹽之瑣屑閭閻利弊得失靡不洞燭其隱而深中其情於是孳孳然爲之裁酌區畫而公私咸獲其利視一邑之事固無異一家之事矣今又舉其久廢之典補輯詮次俾之咸正而無缺不猶一家之數目必紀以遺子孫其同此父母之心耶雖然志以紀事似也顧察侯之心則有思深而慮遠者予不能事爲之言就其大者論之徭役昔固有定額也今則費增於倍蓰即使力爲之減省而已盡於誅求矣習尚昔固號儉嗇也今則日事於侈靡即使加意於約束而俗已漸成澆漓矣人文昔固彬彬然稱美盛也今則寥寥而鮮實效即使日從事於佔隸而芳烈遠不逮故先矣此皆載諸志中可攷也苟吾邑之父母與邑之士民感今昔之不相及深惟而力挽焉俾徭賦由之以少紓習俗由之以返朴而人文由之一洗其固陋與古昔同其美盛斯固涂塗屬望之心歟孰謂邑志無裨於政而可忽乎哉是志也侯惟繼其成而已若鄉先生余公湘布衣童君珮視草而終始之法得并書

龍游縣誌卷之一

輿地

保章氏九州星土之說大略相因蓋以陰陽之精本在地發於天伏見蚤莫德與政之符也故相風以物土方分象緯以昭麗次嘉生既肇蕃育斯弘此聯四民貞百度者之所必稽云爾志輿地

分野

若稽龍游曰禹貢揚州之域今為衢州支邑

天有三垣紫微太微皆將星輔弼之位而天市下垣則列國星宿在焉蓋垣有二十二星東南第六星曰吳越左氏傳曰越得星紀斗牛二宿漢書曰越地牽牛婺女之分野唐書曰得婺女比于星紀與吳越同占元史曰斗四度三十六分六十六抄入吳越之分皇明清類天文志曰兩湖當南斗須女之分又曰衡自牛五度至女三度為得之唐一行鄭夾漈之說俱不確

沿革

夏帝少康封庶子無餘于於越遂為越地南至白無北至禦兒東至郢西至姑蔑 商揚州之域 周姑蔑國子爵越附庸也及越伐吳吳土孫彌庸壽於姚自泓上觀之見姑蔑之墟 路史國名記曰姑蔑一曰姑妹太末也